

COMUNICATO n. 590 del 09/03/2026

Schützan prodjèkte boda auhaltn un machan khennen di vèrt un di symboln vodar Autonomi

Machan khennen di Autonomi, ågenump di kritèrie zuarzogeba di schütz

[Cimbro] Da provintziàl DJunta, vorgelekk von asesór zo macha khennen di autonomi Simone Marchiori, hatt ågenump di kritèrie un bia zuarzogeba di schütz auzohalta prodjèkte un iniziatiàn boda machan khennen di vèrt un di simboln vodar Autonomi. Dar provedimént lekk panàndar di kornis boda bart mochan innhaltn di auszschreibung von bochan boda khemmen boda di Vüarom bart auzgem auzolesa vorlegom von sèlln boda soìn interesàrt: emtar von draite sektór, lånt emtar, schualn, un formatif istituziongen vodar provìntz.

“Nå in sèll boda sa iz khent getànt daz vorgànnate djar, gianda vürsnen, haür o, di iniziatiàn zo macha khennen in di lentar ünsar spetzialega Autonomi – asó khütta dar asesór Marchiori – Di bochan boda khemmen barpar nidarschraim spetzifige auszschreibung auzohalta konkrètege prodjèkte boda helvan zo macha khennen di stòrdja, di kultùr un di rècht vodar trentinar Autonomi, haltante kunt vor earst von djungen un von vèrt bodase auznemmen vo allz daz åndar: responsabilitét, toalnemmung, sèlbartredjar, solidarietét un gehöarung inar kamòuschaft.

Ber 'z magda nemmen toal un baz ma mage tüan

Nå in sèll boda auzmacht dar briaf ågenump, dar schütz mage khemmen gètt in fraiböllege un in sotzialn feroine inngeschribet in RUNTS, åndre feroine, di stiftung (auz baz di sèlln augehaltet vodar autonome Provìntz vo Tria) un åndre privàtt emtar boda nèt hãm in zil zo gebinna, di Kamöüandar, di Toalkamöüandar/Etsch Tal, di formatif istituziongen boda hãm soìn setz in di provìntz vo Tria.

'Z mangda khemmen geschützt di prodjèkte un di iniziatiàn bodase haltn in di lentar vodar provìntz boda vürleng ummana odar mearare zbisnen disan ativitét:

- vürvüarn un machan khennen da stòrege, kulturàl odar da rèchtliche stòrdja vodar Autonomi von Trentino;

- gem vèrt dar kultùr vodar Autonomi, daz earst zbisnen in djungen djeneratziongen;
- auzvennen, gem vèrt, un machan khennen simboln vodar Autonomi
- machan studje odar nàsüachan übar dar Autonomi
- machan vorstian pezzar di vèrt vodar Autnomi pitt naüge struméntn.

Dise iniziatiàn mang khemmen vürgevüart pitt auzlegom, labör, odar machante musik, teatro, kino, tentz, un åndre kunst.

Di prodjèkte mochan vürvüarn umman odar mearare vèrt vodar Autnomi: responsabilitét, toalnemmung, sèlbartredjarn, lem un mittarbatn übar di grentzan åna straitar, solidarietét un gehöarung inar kamòuschaft, darkhennen in zunglich pluralismus. 'Z mangda nèt khemmen geschützt libadarn.

Protzedùr un baz 'z magda khemmen gezalt

Di vorsch bartn mochan khemmen inngètt dar provintziàl struktur boda hatt kompeténtz übar machan khennen un gem vèrt dar autonomi, in di zait un asó azpe da bartn auzmachan di auszschreibung. Di struktur

bart drauschang afte vorsch inngètt – boda bartn khemmen geschètt vonan khnopf laüt zuargelekk garade vor daz sèll – dena bartze nidarleng un anemmen in roatordnung von prodjèkte boda soìn khent ågenump un hãm rècht zo haba in schütz un an lestn bartze zuargem in schütz sin azta bart soìn genumma gètt.

'Z magda khemmen gezalt bazta iz khent gezert auzolega un zo macha in prodjèkt odar di initziatìf, bazta khint gezert zo macha didaktik un divulgatìf geplèttra, bazta khint gezert herzorichta un zo macha khennen di initziatìvan, un darzuar bizzaschaftege un informatege konsulentzan, dienst ummazovüara, grafik prodjèktatzion, arbat gètt in profesionìstn, tipografege dienst, zaln berda redet, un bazma zert vor übarsetzung.

Übarsetzt von Schaltarle vor di zung von Toalkamou vodar Zimbar Hoachebene

(cdt)